

廣雅疏證

廣雅疏證

(清)王念孫 撰

廣雅

廣 雅 疏 證

(全三冊)

〔清〕王念孫 撰

上海古籍出版社出版

(上海瑞金二路 272 號)

新華書店上海發行所發行 上海大統印刷廠印刷

開本 850×1156 1/32 印張 52.375

1983 年 6 月第 1 版 1983 年 6 月第 1 次印刷

印數 1—5,200

統一書號: 9186·24 定價: 6.70 元

廣雅疏證卷第九上

高郵王念孫學

釋天

太初氣之始也生於酉仲清濁未分也太始形之始也
生於戌仲清者爲精濁者爲形也太素質之始也生於
亥仲已有素朴而未散也三氣相接至於子仲剖判分
離輕清者上爲天重濁者下爲地中和爲萬物

列子天瑞篇云太初者氣之始也太始者形之始也
太素者質之始也氣形質具而未相離故曰渾淪又
云一者形變之始也清輕者上爲天濁重者下爲地
沖和氣者爲人故天地含精萬物化生易乾鑿度同
小雅采芣正義引詩緯云陽生酉仲陰生戌仲太平
御覽引詩推度災云陽本爲雄陰本爲雌物本爲魂

雄生八月仲節號曰太初又引乾鑿度云雌生戊仲號曰太始雄雌俱行三節而雄合物魂號曰太素

天地辟設人皇以來至魯哀公十有四年積二百七十

六萬歲分爲十紀曰九頭五龍攝提合雜連通序命循

蜚因提禪通疏詁

續漢書律歷志引蔡邕議云元命苞乾鑿度皆以爲開闢至獲麟二百七十六萬歲文選魯靈光殿賦注引春秋命歷序云皇伯皇仲皇叔皇季皇少皇姓同期俱駕龍號曰五龍又云人皇九頭宋均曰九頭九人也各本攝譌作挺雜譌作雄連譌作建循蜚譌作脩輩疏詁譌作流記司馬貞補三皇紀引春秋緯云十紀一曰九頭紀二曰五龍紀三曰攝提紀四曰合維紀五曰連通紀六曰序命紀七曰循飛紀八曰因提紀九曰禪通紀十日疏詁紀禮記正義引六藝論注云六紀者九頭紀五龍紀攝提紀合洛紀連通紀序命紀書正義引廣雅云十紀者九頭五龍攝提合雜連通序命循蜚因提禪通疏詁今據以訂正

年紀

東方昇天東南陽天南方赤天西南朱天西方成天西
北幽天北方元天東北變天中央鈞天

呂氏春秋有始覽云天有九野中央曰鈞天東方曰
蒼天東北曰變天北方曰元天西北曰幽天西方曰
顛天西南曰朱天南方曰炎天東南曰陽天開元占
經天占篇引尚書考靈曜云東方暎天西方成天南
方赤天餘與呂氏春秋同蓋廣雅所本也暎與昇同
楚辭天問九天之際安放安屬王逸注亦與考靈曜
同變各本譌作變初學記太平御覽引廣雅竝作變
今據以訂正又初學記太平御覽引廣雅赤天竝作
天炎

九天

天園廣南北二億三萬三千五百里七十五步東西短

減四步周六億十萬七百里二十五步從地至天一億

一萬六千七百八十七里半下度地之厚與天高等

億與億同各本園廣譌作園闢周官大司徒疏開元
 占經天占篇法苑珠林日月篇太平御覽並引廣雅
 天園廣南北二億三萬三千五百里七十五步今據
 以訂正又各本八十七里下脫半字大司徒疏引廣
 雅從地至天一億一萬六千七百八十七里半開元
 占經初學記太平御覽法苑珠林引廣雅竝作八十
 一里半雖一與七異文而里下皆有半字今據補案
 此條天度里數與下條宿度里數不同則所采非一
 人之說又案周髀經云天離地八萬里淮南子天文
 訓云天去地億五萬里張衡靈憲云八極之維徑二
 億三萬二千三百里南北則短減千里東西則廣增
 千里自地至天半於八極則地之深亦如之論衡說
 日篇云天行三百六十五度凡積七十三萬里海外
 東經注引詩含神霧云天地東西二億三萬三千里
 南北二億三萬一千五百里藝文類聚引春秋元命
 包云天周九九八十一萬里又引三五歷紀云天去

地九萬里，開元占經天占篇引洛書甄耀度云：天地相去十七萬八千五百里，又引孝經援神契云：周天七衡六間者，相去萬九千八百三十三里三分里之一，合十一萬九千里，又引關令內傳云：天地南午北子相去九十一萬里，東帶西酉亦九十一萬里，四隅空相去亦爾，天去地四十萬九千里，以上諸書所言天度與廣雅或大同小異，或相去縣絕，其廣袤里數不知，據恆星天言之乎？抑據日月五星天言之乎？既無定法，可憑，今皆存而不論。

天度

東方七宿七十五度南方七宿百一十二度西方七宿八十度北方七宿九十八度四分度之一四方凡三百六十五度四分度之一一度二千九百三十二里二十八宿間相距積一百七萬九百一十三里徑三十五萬

六千九百七十一里

此謂赤道度也開元占經二十八宿占引劉向洪範傳云東方七宿七十五度北方七宿九十八度四分度之一西方七宿八十五度南方七宿百一十二度淮南子天文訓云星分度角十二亢九氏十五房五心五尾十八箕十一四分一斗二十六牽牛八須女十二虛十危十七營室十六東壁九奎十六婁十二胃十四昴十一畢十六觜嚙二參九東井三十三輿鬼四柳十五七星七張翼各十八軫十七月令正義引尚書考靈耀云周天三百六十五度四分度之一一度二千九百三十二里千四百六十一分里之三度四十八周天百七萬一千里徑三十五萬七千里說與廣雅小異又案徑三十五萬六千九百七十一里各本皆脫一字周官大司徒疏引廣雅己與今本同今以圍三徑一計之當有一字續漢書郡國志注引帝王世紀周天積一百七萬九百一十三里徑三十五萬六千九百七十一里義本廣雅今據補

宿度

東北條風東方明庶風東南清明風南方景風西南涼風西方闔闔風西北不周風北方廣莫風

淮南子天文訓云何謂八風距日冬至四十五日條風至四十五日明庶風至四十五日涼風至四十五日廣莫風至四十五日景風至四十五日闔闔風至四十五日不周風至四十五日廣莫風居北方廣莫者言陽氣在下陰莫陽廣大也條風居東北維主出萬物條之言條治萬物而出之明庶風居東方明庶者明衆物盡出也清明風居東南維主風吹萬物景風居南方景者言陽氣道竟涼風居西南維主地地者沈奪萬物氣也闔闔風居西方闔者倡也闔者藏也言陽氣道萬物闔黃泉也北堂書鈔引春秋考異鄧云條者生也明庶者迎衆也清明者精也景者大也言陽氣長養也涼者寒也陰氣行也闔闔者咸收也言陽氣不交也言陰陽未合化也廣莫者犬莫也開陽氣也隱五年左傳正義引易通卦驗條風作調風說文作融風各本西南西北下竝有方字後人

以意加之也。上文釋九天之名，四隅皆省一方字。此條內東北條風，東南清明風，亦無方字，今據刪。

八風

昌炎握譽可鎔持勝履子

後漢書班固傳注引河圖云：昌光出軫，五星聚井，太平御覽引符瑞圖云：昌光者，瑞光也，見於天漢，高受命，昌光出軫，晉書天文志云：昌光赤如龍，聖人起，帝受終則見，易是類謀云：王察可鎔一角九尾，握譽持勝，履子，皆未詳。

祥氣

格擇旬始天狗枉矢氛祲倍譎冠珥

擇或作澤，司馬相如大人賦云：建格澤之脩竿兮，總光耀之采旄。坐旬始以爲慘兮，曳彗星而爲髻。說苑辨物篇云：欃槍彗孛，旬始，枉矢，蚩尤之旗，皆五星盈縮之所生也。開元占經妖星占篇引黃帝占云：格澤

者如炎火之狀上黃下白從地而上下大上銳又引
 巫咸云旬始出於北斗旁狀如雄雞其怒青黑象伏
 龍枉矢類大流星色蒼黑蛇行望之如有毛目長數
 匹著天史記天官書與巫咸黃帝占同釋名云枉矢
 言其光行若射矢之所至也開元占經流星占篇引
 巫咸云流星有光見人面墜地若不至地望之有足
 名曰天狗天官書云天狗狀如大奔星有聲其下止
 地類狗所墮及望之如火光炎炎衝天其下圜如數
 頃田處上兌有黃色說文氛祥氣也祲精氣成祥也
 昭十五年左傳吾見赤黑之祲非祭祥也瘞氣也杜
 注云祲妖氛也氛惡氣也周官眠祲注云祲陰陽氣
 相侵漸成祥者倍字或作背譎字或作鑄鑄僑又作
 穴呂氏春秋明理篇日有倍僑有暈珥高誘注云皆
 日旁之危氣也在兩旁反出為倍在上反出為僑在
 上內向為冠兩旁內向為珥開元占經日占篇引京
 氏云氣中赤外青曲向外名為背又引石氏云氣青
 赤曲向外中有一橫狀如帶鉤名為鑄氣青赤立在
 日上名為冠日兩旁有氣短小青赤名為珥淮南子
 覽冥訓云背譎見於天漢書天文志暈適背穴抱珥
 垂魄孟康曰穴多作鑄其形如玉鑄也如淳曰有氣

刺日為鏑鏑，扶傷也。諸家說譎字之義各異，未知孰是。各本倍譎二字，誤在天狗之上。今訂正。

祆氣

赤霄濛瀨朝霞正陽淪陰沆瀣列缺倒景

淮南子人間訓：鴻鵠背負青天，膺摩赤霄。高誘注云：赤霄，飛雲也。楚辭九歎云：譬若王僑之乘雲兮，載赤霄而凌太清。又云：貫瀨濛濛以東，竭兮王逸注云：瀨，濛氣也。倒言之，則曰濛瀨。字或作厖，鴻張衡思元賦云：踰厖鴻於宕冥，是也。楚辭遠遊：滄六氣而飲沆瀣兮，漱正陽而含朝霞。王注云：陵陽子明經言：春，倉朝霞朝霞者，日始欲出，赤黃氣也。秋，倉淪陰淪陰者，日沒以後，赤黃氣也。冬，倉沆瀣沆瀣者，北方夜半氣也。夏，倉正陽正陽者，南方日中氣也。并天元地黃之氣，是為六氣也。漢書司馬相如傳：吸沆瀣兮餐朝霞，應劭注：與王逸同。卷一云：淪，沒也。日沒以後之氣，故曰淪陰淪。曹憲音倫，各本淪字誤作渝。音內倫字誤作淪。又誤入正文。今訂正。楚辭遠遊云：上至列缺兮，降望大壑。漢書司馬相如傳：貫列缺之倒景兮，服虔曰：

人在天上，下向視日月，故景倒在下也。張注引陵陽子明經云：列缺氣去地二千四百里，倒景氣去地四千里，其景皆倒在下。

常氣

一穀不升曰歉，二穀不升曰饑，三穀不升曰饑，四穀不

升曰歉，五穀不升曰大侵。

此襄二十四年穀梁傳文也。穀梁傳歉作嗛，歉作康。范甯注云：嗛，不足貌。康，虛也。侵，傷也。案歉饑饑，皆虛乏之名。饑與飢同意。卷三云：歉，莖少也。莖與饑同意。歉者，空聲之轉。說文：歉，飢虛也。淮南子：天文訓云：三歲而一饑，六歲而一衰，十二歲而一康。韓詩外傳：歉作饑，歉作荒。荒亦歉也。爾雅：漘，虛也。郭璞音義云：本或作荒。泰九二：包荒，鄭讀爲康。

□□□

右影宋本皇甫本畢本吳本皆缺三字胡本據爾雅補災字與所缺字數不合郎本於災下加氣字其謬滋甚今仍缺三字

蒼曰靈威仰赤曰赤熛怒黃曰含樞紐白曰白招矩黑

曰叶光紀

薛綜注東京賦引河圖云蒼帝神名靈威仰赤帝神名赤熛怒黃帝神名含樞紐白帝神名白招矩黑帝神名協光紀周官大宗伯疏引春秋運斗樞云大微宮有五帝座星又引文耀鉤云春起青受制其名靈威仰夏起赤受制其名赤熛怒秋起白受制其名白招矩冬起黑受制其名叶光紀季夏六月火受制其名含樞紐拒與矩同協與叶同字亦作汙

五帝號

立春春分東從青道二出黃道東交於房二度中立夏

夏至南從赤道二出黃道南交於七星四度中立秋秋分西從白道二出黃道西交於胃十二度中立冬冬至北從黑道二出黃道北交於虛二度中四季之月還從

黃道

唐書大衍歷議引洪範傳云日有中道月有九行中道謂黃道也九行者青道二出黃道東赤道二出黃道南白道二出黃道西黑道二出黃道北立春春分月東從青道立夏夏至月南從赤道立秋秋分月西從白道立冬冬至月北從黑道漢書天文志略同大衍歷議又云推陰陽歷交在冬至夏至則月行青道白道所交則同而出入之行異故青道至春分之宿及其所衝皆在黃道正東白道至秋分之宿及其所衝皆在黃道正西若陰陽歷交在立春立秋則月循赤道黑道所交則同而出入之行異故赤道至立夏之宿及其所衝皆在黃道西南黑道至立冬之宿及其所衝皆在黃道東北若陰陽歷交在春分秋分則